

1. प्रधानमंत्री नरेन्द्र मोदी होर अज्ज गुजरात च 5 ज्हार 5 सौ करोड़ रपे कोला मती लागत दी बक्ख-बक्ख विकास परियोजनाएं दी शरूआत करगंन।
2. राष्ट्रपति द्रौपदी मुर्मू होर अज्ज राष्ट्रपति भवन च पद्म पुरस्कार भेंट करगंन।
3. चुनां कमीशनर नै तमिलनाडू ते असम दिएं 8एं राज्यसभा सीटें लेई दळं ब'रें च इक बारी होने आले चुनाएं दी घोषणा करी दिक्ती ऐ।
4. विदेश मंत्री डॉ. एस.जयशंकर हुंदा आखना ऐ जे पाकिस्तानी फौज ते सरकार शहरें थमां चलने आले आतंकी संगठनें दा खुल्लियै समानि करदी ऐ।
5. स्वीजरलैंड च नॉटविल विश्व पैरा एथलीट ग्रैंड प्री पतियोगिता च महेन्द्र गुर्जर नै मर्दे दे नेजा सुट्टने आली श्रेणी च नमां विश्व रिकार्ड बनाया ऐ।

<><><><><><>

## PM-Gujrat

प्रधानमंत्री नरेन्द्र मोदी होर गुजरात दे गांधीनगर च महात्मा मंदर च 5 ज्हार 536 करोड़ रपे दी लागत आलिएं बक्ख-बक्ख विकास परियोजनाएं दा नीह पत्थर रखगंन ते उद्घाटन करगंन। इंदे च शहरी विकास, बुनियादी ढांचा, पानी सरबंधी साधने स्रोतें दा प्रबंधन, सेहत सरबंधी हिफाजत ते राजस्व मुत्तलक सेवाएं दियां परियोजना शामिल न। प्रधानमंत्री होर गांधीनगर च गुजरात अर्नन ग्राउंथ स्टोरी दे 20 ब'रे पूरे होने दे मौके पर लगने आले इक खास प्रोग्राम च बी शामिल होंगन।

<><><><><><>

## President Padma Awards

राष्ट्रपति द्रौपदी मुर्मू होर अज्ज राष्ट्रपति भवन च दुए सिविल अलंकरण समारोह च पद्म पुरस्कार भेंट करगंन। मुख्य दे सर्वोच्च नागरिक पुरस्कारें चा इक पद्म पुरस्कार त्रळं श्रेणिएं च दिक्ते जंदे न-पद्म विभूषण, पद्म भूषण ते पद्म श्री। एह पुरस्कार कला, सामाजिक कम्म, सार्वजनिक मामले, विज्ञान ते इंजीनियरिंग, बपार ते उद्योग, चिकितसा, साहित्य ते शिक्षा, खेड्ड ते प्रशासनिक सेवा समेत बक्ख-बक्ख विषयें ते क्षेत्रें च दिक्ते जंदे न।

<><><><><><>

## ECI R.S.Polls

चुनां कमीशन नै राज्यसभा दिएं 8एं सीटें पर द्विवार्षिक चुनाएं दी घोषणा करी दिक्ती ऐ। इंदे च तमिलनाडू दी 6 ते असम दियां दो सीटां शामिल न। कमीशन दे मताबक अधिसूचना अगले म्हीने दी दो तरीक गी जारी कीती जाग ते 19 जून गी वोट पोआए जांगन। वोटें दी गिनतरी बी इस्से दिन कीती जाग। राज्यसभा दे 8एं मेंबरें दा कार्यकाल इस ब8रे जून-जुलाई बश्कार समाप्त होआ करदा ऐ। तमिलनाडू थमां राज्यसभा दे 6एं सांसदें डॉ. अनुमणि रामदास, एम. षणमुगम, एन.चन्द्रशेखरन, एम.मोहम्मद अब्दुलला, पी.विल्सन ते वाइको इस ब'रे 24 जुलाई गी सेवानिवृत होआ करदे न। असम च मिशन रंजन दास ते वीरेन्द्र प्रसाद वैश्य हुंदा कार्यकाल 14 जून गी समाप्त होआ करदा ऐ।

<><><><><><>

## IMD

भारत दे मौसम सरबन्धी विभाग नै अज्ज कर्नाटक दे समुंद्री कंडे आले इलाके, कोकण, गोवा ते मध्य महाराष्ट्र च टामी-आमी थाहरें भारी कोला मती भारी बरखा पौने दी पेशगोई कीती ऐ। छत्तीसगढ़, केरल, पच्छिम बंगाल दे गंगा कंडे आले इलाके, मराठावाड़ा, तमिलनाडू, पुडुचेरी, अंडेमान ते निकोबार टापू ओडिशा ते उत्तर पूर्वी राज्यें च अगले दऊं/त्रऊं दिनें च भारी बरखा पौने दा अनुमान जाहर कीता ऐ। मोसम सरबन्धी मैहकमे नै हिमाचल प्रदेश, दिल्ली, आंध्रप्रदेश, राजस्थान, हरियाणा, चंडीगढ़, ओडिशा ते पच्छिम बंगाल च अगले दऊं-त्रऊं दिनें च धूल भरोची दी हवा चलने ते गरजियै फंडा पौने दी पेशगोई कीती ऐ। हिमाचल प्रदेश च अज्ज हैनगड़े बी पौने दी शंका ऐ। पश्चिमी राजस्थान च अज्ज दिने लूह चलने ते धूल भरोची दा तूफान चलने दी शंका ऐ।

<><><><><><>

## DM-Defence

रक्षा मंत्री राजनाथ सिंह होरें आखेआ ऐ जे सरकार रक्षा औद्योगिक आधार गी मजबूत करने ते रक्षा क्षेत्र दे सार्वजनिक उपक्रमें डीपीएसयू च मकाबलेबाजी बधाने लेई वचनबद्ध ऐ। इक बैठक च मंत्री होरें पूरे रक्षा उद्योग जेहदे च डीपीएसयू बी शामिल हे, दा जायजा लैता। उनें मंचें ते तकनालोजी गी विकसित करने लेई इंदी भूमका दी सराहना कीती। बैठक च उनें आपरेशन सिंदूर दरान भारतीय सशस्त्र बलें दी युद्ध तैआरिएं गी प्रदर्शित करने आले प्लेटफार्मे ते प्रौद्योगिकिएं गी विकसित करने च रक्षा सार्वजनिक उपक्रमें सनें समूलचे रक्षा उद्योग दी भूमका दी सराहना कीती। राजनाथ सिंह होरें रक्षा उपक्रमें गी सशस्त्र बलें गी समें पर रक्षा उपकरण सौंपने आस्तै प्रेरित कीता। उनें हिंदुस्तान एयरोनॉटिक्स लिमिटेड गी महारत्न ते मझगांव डॉक शिपबिल्डर्स लिमिटेड गी नवरत्न दा दर्जा थोने पर बधाई दिती।

<><><><><><>

## Jaishankar Pakistan

विदेश मंत्री डॉ. एस जयशंकर होरें दस्सेआ ऐ जे आतंकवादी संगठन पाकिस्तान दे शैहरें ते कस्बें थमां खुल्लियै कम्म करा'रदे न। उनें आखेआ जे आतंकवाद पाकिस्तान च इक खुल्ला कारोबार ऐ जेदा समर्थन उसी रपें दी मदाद ते उसदा इस्तेमाल पाकिस्तानी फौज ते राज्य आसेआ कीता जंदा ऐ। जर्मन अखबार गी दित्ते गेदे इक इंटरव्यू च डॉ. जयशंकर होरें आखेआ जे भारत नै आतंकवादियें गी साफ संकेत दित्ता ऐ जेकर कोई आतंकवादी हमला होआ ते उसदे लेई उनेंगी उसदी सख्त कीमत चुकानी पौग।

<><><><><><>

## APD

भारत दे बहुदलीय प्रतिनिधिमंडलें बक्ख-बक्ख मुल्खें दा दौरा लाया ते आतंकवाद गी बिंद बी बर्दाश्त नेई करने आले सनेए गी जारी रखदे होई वैश्विक सतह पर पाकिस्तान आस्सेआ आतंकवाद गी दित्ते जा'रदे समर्थन दा पर्दाफाश कीता। फ्रांस च सर्वदलीय प्रतिनिधिमंडल दी अगुवाई करा'रदे बीजेपी दे सांसद रवि शंकर प्रसाद होरें आखेआ जे भारत आतंकवाद खलाफ अपनी लड़ाई च इकजुट्ट होइयै खड़ोते दा ऐ। कांग्रेस सांसद शशि थरूर हुंदी अगुवाई च इक सर्वदलीय प्रतिनिधिमंडल दे मिंबर बीजेपी सांसद तेजस्वी सूयां होरें गुयाना दी राष्ट्रीय असैबली दे अध्यक्ष गी अपनी टिप्पणी च पाकिस्तान आस्सेआ कीते गेदे आतंकवाद दे कम्में बारे जानकारी दिती। बीजेपी सांसद वैजयंत पांडा हुंदी अगुवाई च इक सर्वदलीय प्रतिनिधिमंडल कुवैत गेदा हा जिसलै के जेडी(यू) दे सांसद संजय झा हुंदी अगुवाई च इक प्रतिनिधिमंडल नै आतंकवाद खलाफ भारत दे पक्के धेइयै गी उजागर करने लेई दक्खन कोरिया दा दौरा लाया।

<><><><><><>

## UK-Car Incident

इंग्लैंड दे लिवरपूल फुटबाल क्लब दे प्रशंसकें पर इक विकट्री परेड दरान इक कार चाढ़ी देने कारण घटोघट्ट 47 जनें घायल होई गे न। टीम दी बस जाने दे 10एं मिंटें मगरा एह हादसा होइ गेआ। पुलस नै लिवरपूल थमां इक 53एं ब'रे दी बरेसू दे आदमी गी गिरफ्तार कीता ऐ। पुलस दा आखना ऐ जे एह हादसा आतंकवाद कन्नै नेई जुड़े दा ऐ। घायल होने आले 47एं जनें चा 27एं जनेंगी अस्पताल दाखल कराया गेआ। 20एं जनें दा घटना आली थाहरा पर गै इलाज कीता गेआ। कार दे हेठ फसे दे इक जने समेत चऊं जनेंगी बचाई लैता गेआ। प्रधानमंत्री कीर स्टारमर होरें लिवरपूल दे लोकें कन्नै इक जुटता जाहर कीती ऐ, उनें आखेआ जे पूरा राष्ट्र लिवरपूल दे लोकें कन्नै खड़ोते दा ऐ।

<><><><><><>

## Indian Para Athlete

स्वीजरलैंड दे नॉटविल शहर च चला'रदी विश्व पैरा एथलीट ग्रैंड प्रिक्स च भारतीय पैरा एथलीट महेन्द्र गुर्जर नै मर्दे दी एफ-42 श्रेणी च नेता सुट्टने आले मकाबले च रिकार्ड बनाया ऐ। उन्नै 61.17 मीटर दूरी तगर नेता सुट्टेआ ते विश्व रिकार्ड बनाया। 27एं ब'रे दे महेन्द्र गुर्जर नै ब8रे 2022 च ब्राजील दे राबर्टो फ्लोरियानी एडेनिल्सन आस्सेआ बनाए गेदे 59.19 मीटर दे रिकार्ड गी त्रोड़ी दित्ता ऐ।

<><><><><><>

## IPL

आईपीएल टी-20 क्रिकेट च कल रातीं जयपुर च पंजाब किंग्स नै मुंबई इंडियन्स गी हराइयै शोर्ष 2 च थाहर बनाई लैती ऐ। एहदे कन्नै गै पंजाब नै पैहले क्वालीफायर च अपनी थाहर पक्की करी लैती ऐ। पैहले बल्लेबाजी करदे होई मुंबई इंडियन्स नै पंजाब गी 184 रंज दा लख्य दित्ता जेहूदे परते च पंजाब किंग्स नै 9 गेंदा बाकी रौहदे 187 रंज बनाइयै मकाबला जित्ती लैता। प्रतियोगिता च अज्ज लखनऊ सुपर जायंट्स दा सामना रॉयल चैलेंजर्स बैंगलुरु कन्नै होग, एह मैच संजा साढ़े 7 बजे थमां लखनऊ च खेड़डेआ जाग।

<><><><><><>